

31. maj 2017

Qitornavut pitsaasumik inuiaqatigiinni innuttaaqataalernissaasa pingaaruteqarnerat pillugu perorsaalernissarput qanoq oqallisiginerulersinnaaneripput pillugu apeqquteqaat allaavigalugu oqallinnissamik siunnersuut.

(Inatsisartunut ilaasortaq Nivi Olsen, Demokraatit)

Siullermik nuannaarutigalugu Nivi Olsen Demokraatit oqallisissiaanut soqutiginarluinnartumut eqqartussallugulu pingaarutilimmut qujavugut.

Ilumoorluinnarpoq oqaaseq inuunerup aallartinnerani angerlarsimaffik tamanit sorlaavoq, taannaavorlu inuup siunissami kinaanissaanik aamma pinngortitseqataasoq. Ileqqut qanoq ittut, oqaluunnerit qanoq ittut, pissutsillu qanoq ittut tamaasa angerlarsimaffiup qanoq ittuuneranik oqaluttuaruusarput. Tamatuminnga isumaqatigilluinnarpatsigit, ilumut perorsaaneq maani eqqartussallutigu pisariaqarpoq.

Pisuutitassatsinnik tikkuartorsinnaasagut amerlagunaraluaqaat, taamaattoq allanut eqqartuulinnginnermi imminut qiviaqqaarnissarput eqqortuuvoq. Ilaqutariinni qanoq immitsinnut oqaluuttarpugut? Qanoq pissuseqarfigisarpugut? Qanorlu sunniisarpugut? Iliuutsigit tamaasa allanut sunniuteqartarput inuunerlumi tamarmi ilinniarfiuvoq. Ikioqatigiinnitsigullu angusassat annertunerusut pisinnaalluaqaagut (piumagutta), pingaaruteqaqaarlu torersumik ileqqorissaartumillu immitsinnut pissuseqatigiinnissarput tamannaavorlu innuttaaqatitsinnut siammartigassarput.

Inooriaaserput ukiut qulikkaar ingerlaneranni allanngorsimaqaaq, teknikkikkut siuariartornerput sukkasuumik ingerlavoq. Akerlianilli inooqataanikkut immitsinnut ataqqinnissuserput annikilliarortutut illuni, allaat immitsinnut aperisariaqalersilluta qanoruna iliorutta pitsaanagerusumik ileqqorisimasagut pitsaasut perorsaanikkullu maligassiuulluuartarsimanigut uterteqqissinnaagigut?

Susassareqatigiinngippallaalersimanerpugut? Ilaqutariittut ataqatigiinnigut oqaasertalinngippallaalersimanerpugut? Sunut tamanut angertussiaannanngorsimanerpugut? Meeqqagut uatsilli perunnnginnissaat piinnarlugit killiliisinnaajunnaarsimanerpugut? Imaluunniit perorsaanerput mumillugu meeqqatsinnut kisiat naleqqussarluta pissuseqalersimanerrpugut? Eqqoriarsinnaasarpassuput.

Qangaanerusoq ilinniartitaaneq inuiannut suli siaruangikkallarmat inoqutigiit imminnut qanoq ataqqeqatigiittarnerat ersarissuq ullutsinni oqaluttuaannanngorsimagunarpoq? Aningaasanik taarserneqarsinnaanngitsumik annertuumik tassuunatigut annaasaqarpugut, kingumullumi qiviarluni tupinnaqaaq qanga siuaasagut ullumikkut tulluussimaarutigisartakkatsinnik taasakkagut qanoq imminnut ataqqilluinnarsimassusiat. Susassareqatigiinneq paaseqatigiinnerlu minnerunngitsumik ikioqatigiilluarneq annassutigisimavaat.

Ullumikkulli nalitsinnut qiviarta. Killiffipput qallickuinnaanngitsoq annaasaqarfiusoq, inooriaatsitta allat oqartarnerattuut siuariartorfiusoq aammalu ineriartorfiusoq, pingaaruteqarporli naapretuuttumik nalilersuinissarput; suunuku ullumikkut iluatsissimasut? Akerlianilli suunuku iluatsissimanngikkigut, aamma sooq?



Perorsaariaaseq ullutsinni ilaatigut peqqutaalluni meeqqat atuarianni ilinniartitsinissamut ilungersuanerujussuit atugaasut ilinniartitsisorpassuarnit nilliaatigineqartarput. Ilinniartitsinerit perorsaavitut atorneqartut, ilinniartitsisut atuartsiniaraluarlutik naalatitsisinnaangitsut, atuartullu atuarifik kia-laarfittut atoraat allaallumi naapittarfittuinnag ilaatigut atuarifik atorneqartoq. Aali siunissattut taasagut, ila ernumanissamut patsisissaqarnitta ersarikkaluassusia.

Imaanngilarli tamarmik iluatsittangitsut, apeqqutaaqataaangitsoornermi ajorpoq ilinniartitsisutut atuartunik tiguaasinnaaneq peqataatitsinerlu. Taamaattumik puigussanngilagut iluatsittumik angusaqarsimasut. Nersualaartariaqarpagut atuartut ilinniartitsisullu kusanartumik maligassiuissimasut, iluatsippallaarsimanngitsut pillarnagit kaammattorlugit peqataatittariaqarpagut.

Puigunngisassarpullu annerpaaq tassaasoq angerlarsimaffik. Angerlarsimaffinni perorsaaneq meeqqap avatangiisaanut pingaarnepaavoq. Immitsinnut qiviartariaqarpugut, nalunngilarput inuiattut qanoq killiffeqartugut. Kukkussutigisimasagut teqeqqumut toqqornagit nassuerutigisariaqalerpagut oqallisigalugillu, taamaattumik siusissumik iliuuseqarneq tassaavoq qatserinissamut pinaveersaartitsineq.

Perorsaaneq tassaavoq inuunerup sorlaa. Perorsaanerlu tassaavoq siunissatsinnut aquutit pingaarnersaat, taamaattumik Nivi Olsen ilumoorpoq oqarmat torersumik ileqqorissaartumillu immitsinnut pissuseqarfigisariaqarpugut, inuiannguuvugut ikittut taamaattorli pingaaruteqaqaaq nukittunissarput.

Qujanaq oqallissaarummut

Laura Táunâjik

Siumut